

ALE LA MERERA TE POL EIA KEKESIALE TAITAS

1-4 Tavu e Taitas,

Eiau e Pol, eau kekesiamu e latugu sesele te la isale Kraist, eia La Uru galua. Eau la bilalaha te La Tahalo Uru, eau la tahalo la valolo te la isale Iesus Kraist. La Tahalo Uru visati leau veia ge baheau soio te la valalua me hatavivile tetala veia eau ge valolo legiteu la merera tetala sesele, egite ge matagaga pepeho, la vulovulo giteu ge maroka tataho. Me la merera tetala, eia sesele tomi moli, La Tahalo Uru kama koramulia ge visigolo. Ale pala eia soukama vipou la mori me la magasa, eia toiti la merera veia ge vimahuli la valalua me hatavivile tetala. Me la merera tetalale, etato rovia veia mai etato ge sau tola seselea, etato ge tahola la mahulila ale mulimuli, la kaluvula ge ouka. Me te la tilau tetala moli, la mererale eia puruti soio te Iesus, ale amite valoloti te la isala. Me La Tahalo Uru sugu tarotiagu la merera tetalale veia la igogolu taku eau ge valolo molila, ale la masasagala tetala. Eia La Uru gatou, eia moli vimahuli la valalua me hatavivile tomi. Eiala moli ele Taitas, eau kekesiamu ovola. Me oio te la isale Iesus Kraist la tahalo la vimahuli tegatou, eau toi la vibalavala te La Tahalo Uru soio taume veia eia ge sugu taroamu la gilogo tetala ale uru, la tiamu oilo ge malilo tataho.

La vulovulo giteu la mulugaluga te la lotu

⁵ Taitas, ale pala eau hiliti tarome oio te la olu e Krit, eau tola tarotiamu te la igogolu la vibaumuli te la lotu oio la gale alele, la vuhula eau veia eme ge vulalai pasi muga la igogolu tegalua te la gilalu la lotu te Kraist, ale pala etala lamolamotia. Eau masagea veia eme ge tabari egiteu la mulugaluga la lotu isahari ale ge vibaumuli oio te la maututula tegiteu tomi isasasa. Taritigi eme ge tilimuli molia mai ale eau veitiamu pala, ⁶ mai la mulugaluga te la lotu, eia ge la tahalo sesele, veia la iruru bakisi kama ge tabuli oio tetala. E rutula ge isa moli, e latatula tai ge toro moli te la lotu, egite kama ge e guliliki la vareagila ale la valalua ge mera kukumua giteu.

⁷ Mai eme ge vauru la tahalo isa veia eia ge la mulugaluga te la lotu, ale eia sau tolati la igogolu te La Tahalo Uru. Eala eia taritigi veia la iruru bakisi kama ge tabuli oio tetala. Eia umala ge la tahalo la vareagila, eia umala tai ge rovi la igototolola. Eme umala tai ge ababi egiteu la tahalo la iliu. Umala tai ge hilovi egiteu la tahalo ale hate mamamago te la vikokuela. Umala ababi tai egiteu la valalua ale gabutatala la pakalila.

⁸ Eala moli la mulugaluga isasa te la lotu, eme ge hilovia la vulovulola ge taritigi pepeho maie: Eia ge la tahalo la vilali la mosi. Eia ge la tahalo ale la vulovulolala taritigi. Eia ge la tahalo la igogaumala, la tilogo tai. Eia ge la tahalo ale la vulovulola matata tomi moli. Eia ge la tahalo ale toro sesele te la merera te La Tahalo Uru. Eia ge la tahalo tai ale magiri vagari te la tovolalaila, kama ge boru. ⁹ Eia ge la tahalo ale matagaga sesele te la masova la merera te Kraist. La merera alele

eia vimariti ovola, eia rovitia veia eia sesele. Me oio vola, eia taritigi veia eia ge vagari veia ge tutu tolea giteu la valalua me hatavivile me gulikiliki ovola, me eia ge barautu taro tai la merera tegiteu ale visigologolo.

La vulovulo la vareagila eia volu seseleti oio e Krit

¹⁰ Egiteu la mulugaluga te la lotu, eau masaga la vulovulo giteu ge vagari maie, la vuhula oio mutou ele la valalua la vareagila oio mapaititi, egite visigologolo la valalua me hatavivile te la vikara papaila tegiteu. Me ale mamuga sesele tegiteu ele te la visigologolola, eau rovia, mai egiteu la valalua ale vagari tavu la imoimo la merera tomi te Moses. Egiteu mai ale soloio te la lotu e Iuda, veia la valalua te Kraist ge tilimuli molia, ge koro la vovo giteu mai ele.

¹¹ Mai amutou me la mulugaluga ge barautu harari la merera tegiteu ele. La vuhula egite oio igo marapa la pulolou tegiteu e tau me latatu isahari, ale egite vimari gegeruti egiteu maie. Eala moli egite gabutatala molia veia la valalua ge abia giteu la uati. ¹² Mai la merera te la uru giteu e Krit isa, eia pala veipala loua giteu maie mago “Egite la valalua e Krit la tahalo la visigologolola, egite mai la paia hou. Egite tuha malulu moli, ali pepepe.” ¹³ Me la merera te la tau Krit alele, eia sesele moli. Me alele Taitas, taritigi eme ge karasuku vagari egiteu la valalua me hatavivile te la lotu, veia egite ge pou tataho mai ele te la vulovulo la lotu, ¹⁴ egite kati ge roromuli la merera la visigologolola tegiteu e ururu le Iuda

ale pala. Mai alele egite kati ge gabu tikumu tai la merera la visigologolola mai la vimari te la vovo, ale loio te la hare giteu ale tahi taroti e Kraist.

¹⁵ Sesele, etatou la valalua me hatavivile la lotu te Iesus, mai e Kraist ge vimaroka la tia gatou, ale etato la magiri robola ouka te la paga isasa. Eala moli egiteu ale la gabutatalala tegiteu kati kokora, me mai ele egite kati gabu tikumu e Kraist, la vulovulo tomi eia mai ale vulo sapoloti te la mata giteu, eia mai ale mumuguti, la vuhula la gabutatalala tegiteu oilo eia mumugu tomi moliti.

¹⁶ Egite veia egite rovi sesele La Tahalo Uru, eala moli egite kama veipalea mai ele, te la vulovulo giteu egite mai ale tahi taro loua. Egiteu la tahalo la vareagila, egiteu la maroa moli, egite kamati koramuli la igogolu isa ale taritigi.

2

La tutu tolala soio tegiteu la ururu

¹ Taitas, eia taritigi eme ge tovo egiteu la valalua me hatavivile te la lotu, te la vulovulo ale koramuli la tahalo ale roromuli sesele e Kraist.

² Egiteu la ururu, la vulovulo giteu ge taritigi tomi moli maie: Egite ge la tahalo la tia madidila. Egite ge rovi la tilogo. Egite ge hate tatola moli te la vulovulo la vovo, mai ale egite ge vipuhi tigi moli la valalua me hatavivile tomi te la lotu. Mai tai ele egite ge magiri vagari moli te la tovolalaila. Eme ge vimari egiteu te la pulolou tomi ale taritigi pepeho mai ele, Taitas.

³ Tio, me mai tai lou ele, eme ge tovo tai egiteu e hatavivile ururu veia la pulolou tegiteu ge taritigi tataho, mai egiteu e hatavivile la lotu sesele. Egite

umala ge vikara kukukumu. Egite umala tai ge pou tavu la iliu la lalu ale vagarigari. Taritigi egite ge tovo tataho legiteu la soesobe me egiteu ale taulaiti la gauru ale taritigi ⁴ veia egite ge suli pepeho egiteu e hararua giteu, e latatu giteu, egite ge vibaumuli tataho soio tegiteu mai ele. ⁵ Egite hatavivile ururu ge viteteli tai la soesobe veia egite ge pou tataho, egite ge hate tola moli, egite kama ge para osaosa. Egite ge ruturutu molia giteu e hararua giteu, la vuhula mai egite kama ge pou tataho mai ele, egiteu isahari soukama ge hiloa, me egite ge vile la merera te La Tahalo Uru ovola.

⁶ Me mai tai ele, eme ge tutu tola taia giteu e maure halabalaba veia egite ge lagu tavu moli la vulovulo ale taritigi, egite ge pou tataho moli.

⁷ Mai emei, Taitas, la vulovulomu ge taritigi te la mata giteu, me mai ele egite ge rovi la vulovulo ale taritigi. Eme ge vimari sesele egiteu, la merera taume ge tikumu tomi moli, ⁸ eme ge vikara tataho, isa kama koramulia ge tahi tarome te la merera taume. Me mai ele egiteu ale masagea veia ge vile etatou, egite ge mahela, la vuhula egite kama koramulia ge sivuti isa la iruru omai tegatou la valalua te Kraist.

⁹ Eme ge veia giteu la tahalo la igogolu veia egite ge roromuli tataho la uru giteu ale babaha egiteu soio te la igogolu. Egite ge vagari veia la igogolu tegiteu ge visagege la uru giteu mai ele. Egite umala ge putu ololi la merera te la uru giteu veia ge vulo loua. ¹⁰ Egite umala tai ge pakalikali. Eala moli la vulovulo giteu ge veipalea veia egite koramulia ge sau tola la igogolu tomi. Me mai ele

la vulovulo giteu mai ale vitokoromo la gauru te La Tahalo Uru, la tahalo la vimahuli tegatou. La valalua me hatavivile ge hiloa veia la gauru tetala eia taritigi pepeho, egite ge isua mai ele, egite ge polo ovola, goio te Kraist.

¹¹ La Tahalo Uru, eia veipalatia gatou la gilogo tetala ale uru, ale eia veia ge vimahuli la valalua me hatavivile tomi. ¹² Me oio te la gilogo tetalale, etato rovitia mai ele veia etato ge sugu taro la vulovulo la vovo ale vaubi soio te La Tahalo Uru. Etato ge lagu tavu moli la vulovulo ale maroka, mai te la pulolou ale taritigi, eia matata tomi moli. Etato ge veipala mai ele la masasagala te La Tahalo Uru veia etatou la valalua me hatavivile te la imamala ale igoie, etato ge mata kaseka tavua.

¹³ Etato ge pou tataho moli mai ele, ale etato pou tali La Tahalo Uru tegatou, e Iesus Kraist, la tahalo la vimahuli tegatou. Eia ge beu rivu loua vikipopo la matagaga ale uru pepeho. Mai la merera te la guluvi tetala eia veipalatia, me etato ge sagege ale etato ge hiloa veia eia sesele. ¹⁴ La riau tegatou ele, eia sugu taro moli la mahulila tetala veia ge rou rivu lou etatou taro la kilisi te Satan. Me eia igotia mai ele veia ge vimaroka etatou, etato ge la valalua me hatavivile tetala sesele, etato ge vagari tavu moli la vulovulo la matagaga.

¹⁵ Tio, Taitas, la merera tomi alele, eme ge vimari egiteu la valalua me hatavivile tomi taume oio vola. Eme ge viteteli egiteu, eme ge vikara vagari tai soio tegiteu la tahalo la vareagila, egite ge gabu tikumu la merera taume. Eme umala ge mahela legiteu ale vilevileme, eme ge vikara

vagari lou soio tegiteu, la vuhula eme la bilalaha te Kraist.

3

La pulolou te la valalua me hatavivile te Kraist

¹ Taitas, eme ge vahiliti la gabutatalala tegiteu la valalua me hatavivile te la lotu, veia egite ge roromuli tataho e gavman, egite ge raragi mai ele veia egite ge lagu tavu moli la igogolu tomi ale taritigi. ² Eme ge veia giteu veia egite umala ge vikara kukukumu, egite umala tai ge vaigigo. Egite ge pou tataho moli, egite ge togo la valalua me hatavivile tomi.

³ Taritigi etato ge gabutala rivu tai ale pala etato lagu tavu moli la vulovulo la maligoma. Etato pala pou mai la paua, etato kama rovi bakisi la merera te La Tahalo Uru veia etato ge roromulia. Pala la visigologolola eia volu pasi te la vulovulo gatou, ale etato souka rovi e Kraist. Etato pala tilimuli bububu moli la masasagala te la vovo mai ele, mai la vulovulo ale kama kokora, la maisu totalola, me la tahi vilela tai soio tegiteu la valalua. ⁴⁻⁵ Ale etato soloio moli te la maligoma mai ele, La Tahalo Uru, eia gogo etatou, eia vimahuli etatou la valalua me hatavivile la iruru, eia visibitala la matagaga tetala ale uru tavu etatou. Etato kama maroka veia eia ge gogo etatou te la vulovulo gatou ale taritigi mai ele, ouka. Eia gogo bulalahu moli etatou, eia suli bulalahu moli etatou mai ele. Etato vuhi te la isala, ale eia vuhi halaba la kalulu gatou oilo. Me oio vola La Kalulu La Marokala eia vimahuli sesele etatou, etato sibitala halaba lou mai la

pepeso ale e tilala so tapaposa molia, eia maroka.
⁶ La Tahalo Uru eia vivoluti la tia gatou tomi la valalua me hatavivile tetala La Kalulule Iesus, eia la tahalo la vimahuli tegatou. ⁷ Me La Tahalo Uru igoa mai ele veia oio moli te la gilogo tetala etato ge vipuhi tigi tataho me eia, veia etato ge pou mai e latatu La Tahalo Uru, eia ge masaga lou etatou mai ele, etato ge sau tola la mahulila ale sesele, la kaluvula ge ouka. Eia mai la merera tetala ale eia veitia, me la merera tetalale etato toroti ovola veia etato ge mahuli mai la tori oio te la balila.
⁸ Me la merera ale, eia sesele.

Taitas, eau masagea veia eme ge vikara matagaga pepeho soio tegiteu la valalua me hatavivile taume te la merera taku tomi ele. Mai alele, egiteu ale roviti La Tahalo Uru, egite ge lagu tavu moli la vulovulo ale taritigi, mai te la visuli soio te la mautu. Me la igogolu tomi ale taritigi tataho mai ele, eia ge suli la valalua me hatavivile tomi.

⁹ Eala moli Taitas, taritigi egite la valalua me hatavivile la lotu taume ge poke taro la vikara papaila ale egite isahari veia ge vulo papai lou la merera te La Tahalo Uru. Umala tai egite ge pou tavu la giligi la isaisa giteu e ururu ale pehoti. Umala tai egite ge pou bulalahu veia ge vaigo muli la masova la imoimo la merera tomi te la lotu e Iuda, umala. La vikara papaila tomi alele, eia kama ge vivagari amutou, eia la golu bulalahu moli.

¹⁰ Mai isasa eia pou tavu moli la vahiliti la vikara papaila, ale ge igo marapa la valalua me hatavivile, eme ge mera taroa vakasa, goio la vaka luala, veia eia umalati ge vaigo maraparapa

mai ele. Mai eia kama ge lolome, korao, eme ge kisu taro molia, ¹¹ eia e latu la masosori. Me la vulovulola lou eia veipalatia mai ele veia eia ruruti.

La tapasi la merera

¹² Taitas, la tahalo isasa eia ge kolime, eau ge bahea soio taumele. Eau soioge ge baha e Atemis uka e Tikikas, eau soukama rovi tigia. Ale la kilolimu ele ge guvi, eme ge tovo lalai veia etala ge vipoga oio la mautu e Nikopolis, la vuhula eau veia ge pou muga te la mautu alele te la leavala.

¹³ Eme ge tovo lalai vagari molia veia la tahalo la mari uru e Senas, egira me Apolos, eme ge baha egirua soio te la igogolu la valolo, eme ge suli egiruale, ge abia girua la golugolu tomi te la tuluga, mai la ilali me la uati. ¹⁴ Taritigi pepeho tai veia la valalua me hatavivile la lotu oio e Krit ele, egite ge rovi tai la vulovulo la visuli mai ele veia egite ge lagu tavu la igogolu ale taritigi veia egite ge visuli soio tegiteu ale pou la savelela ale uru. Egite umala ge pou bulalahu.

¹⁵ Amite tomi ale omai toi la kavikoki, la haro, la maulavi me la logo sesele soio taume. Eme ge laharoa giteu tomi e tabarabara miteu te la isale Iesus ale oio taume ele. La gilogo te La Tahalo Uru ge pou tamutou tomi.

Eau e Pol.

Nakanai New Testament
The New Testament in the Nakanai Language of
Papua New Guinea
Nupela Testamen long tokples Nakanai long Niugini
copyright © 1983 Wycliffe Bible Translators, Inc.

Language: Nakanai

Translation by: Wycliffe Bible Translators

Contributor: Nakanai New Testament

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures. Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2012-01-19

PDF generated using Haiola and XeLaTeX on 11 Nov 2022 from source files dated 9 Oct 2020

20a3f259-5054-5f5e-b9c6-5d62fbd1e74c